

Thursday, March 13, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

UNION HM VISIT

Union Home Minister Amit Shah chuan naktip Inrinni hian langin Mizoram a rawn tlawh dawn a, hetah hian Zokhawsang-a Assam Rifles insawnna puala hun hman a tel pui ang.

Thudawn danin Union Home Minister hian naktuk March ni 14 atanga ni 16 inkar hian Mizoram state thenawm Assam a tlawh dawn a, hetah hian Mizoram pawh rawn tlawh tel ve in March ni 15 chawhnu hian Zokhawsang-a Assam Rifles insawnna puala programme buatsaih a hman pui dawn a, hun a hmanpui zawh hian a let leh nghal dawn nia thudawn a ni.

Wawiina Assembly thutkhawmah Speaker Pu Lalbiakzama chuan Chief Minister sawmna angin Union Home Minister Amit Shah chuan inrinni ah Aizawl a tlawh dawn a ti a, hetah hian Assam Rifles te Zokhawsanga an insawn theihna tur farewell function chu 23 sector Assam Rifles Khatla ah chawhnu dar 3 ah hun hman tur a ni tih a sawi bawk.

Assam Rifles Zokhawsang-a insawn tur chungchang hi nikum October ni 23 khan Mizoram sawrkar leh Assam Rifles aiawh ten New Delhi Mizoram House ah inremna an ziaak tawh a, he inremna ah hian Assam Rifles te chuan Lammual leh a chhehvela Assam Rifles hmun, Unit Hospital, Loch House, Quarter Guard leh hmun hrang hrang an chhuah san ang a, hetihlai Assam Rifles 23 sector Headquarter Khatla ami leh DIG chenna Raj Bhavan bul ami chu an chhuahsan dawn lo a ni.

Sawrkar hotute sawi danin Assam Rifles in ram an chhuahsan tur te hi Restriction of Use of Transferred Land Act 2022 tlawh chhanin Mizoram sawrkar ram a ni nghal dawn a ni.

Voicecast

Aizawl khawpui atanga Assam Rifles Zokhawsang-a sawn chungchang hi kum 1988-a Pu Laldenga kaihhruai MNF Sawrkar lai atanga intan a ni a, tualchhunga buaina thlengah sipaiten tualchhung mi 11 an that a, heta tang hian mipui thinlungah Assam Rifles Zokhawsang-a sawn duhna boruak a lian chho hle a, kum 2019 khan Union Home Ministry chuan Assam Rifles te chu Zokhawsang-a insawn turin thu alo pe tawh a, hei hi harsatna hrang hrang Assam Rifles lamin an sawi avangin tih khawtlai a ni a, hemi hnu hian hmalakna hrang hrang kalpui niin kum 2023 khan Union Home Minister Amit Shah chuan Assam Rifles Zokhawsang Complex chu alo hawng tawh a ni.



CM

Chief Minister Pu Lalduhoma chu nimin khan New Delhi ah zinin Parliamentary Affairs Minister Kiren Rijiju chu a chenna inah a hmu a, thil pawimawh hrang hrang an sawi dun a ni.

Chief Minister social media account X hmanga tarlan danin Kiren Rijiju nen hian ramchhunga hnam hnufual chawikanna tur leh hmasawn zel dan tur

an sawi a, heng bakah hian Mizoram hmasawnna tur hrang hrang an sawi dun a ni.



PWD MINISTER

Public Works Department Minister, Pu Vanlalhlana'n tun thla chhungin National Highway 44 A laih hna thawk chhonzawm tur tender koh a ni dawn tih a sawi.

He thu hi vawiina Assembly rorel inkhawmah sawiin, Minister chuan National Highway 44A laitu Gayatri Projects Ltd. te chu an hna a muan lutuk avangin an ban a, hnathawhna tura pawisa bang cheng vbc 199, nuai 7, sing 5 thawk chhonzawm turin tender an ko tih sawiin chhangtu an tlem avangin cancel a ni a ti a, March thla chhungin tender koh leh an tum dawn sawiin thla hmasaa Union Minister of State for Road Transport & Highways and Corporate Affairs, Harsh Malhotra-a'n Mizorama a rawn tlawh tum khan NH-44 A one time Improvement By passed road chu tun thla chhung ngeiin bawhzui a nih tur thu a hrilh niin a sawi bawk.

Minister chuan Mizoram leh Tripura inkalpawhna kawngpui pawimawh tak, Tuipuibari to New Kawnpui, Tripura chu kilometre 9 khawih tawh a ni a ti a, a bak khawih chhonzawm ala nilo tih sawiin an khawih chhonzawm loh chhan hriat ala nilo tih a sawi bawk.



MSU PRESS CONFERENCE

Mizo Students Union (MSU) chuan zirtirtu NET emaw Ph.D emaw neilo, Sawrkar in vawi tam tak hun a pek hnua tling theilo te chu sawrkar in ban ngam se an duh thu a sawi.

He thu hi vawiin Aizawl Press Club a Chanchinbu mite an kawmnaah sawiin Mizo Students Union (MSU) President Pu B Lalkhawngaihzuala chuan zirtirtu qualifiy lo te chu Sawrkar in hnawl ngam turin an duh tih sawiin Casual teacher te laka huaisen tak leh rualkhai taka hma an lak angin Part time College teachers te lakah pawh duhsak bik nei lova rualkhai taka thutlukna siam turin sawrkar an ngen tih sawiin Sawrkarin Qualified-lo te an thawh chhonzawm theihna tura February ni 21 a approval a pek chhuah tawh chu sut leh ngei se an duh thu sawiin hmalakna a awmlo a nih chuan thui zawkin MSU in hma an la dawn tih an sawi bawk.

MSU chuan Casual Teacher chungchangah Sorkar hmalaknaah an lawm viau laiin Higher & Technical Dept in Part Time Asst Professor 29 zet UGC in a phut anga PhD emaw NET neilo kumkhat atana hun a pek belh leh chu MSU in a hrethiam lo hle tih an sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

